

Канон преподобному Мартирию Зеленецкому

Память празднуем 11 (24) ноября

Тропарь, глас 2-й

От юности, Богоблаженне, Христа возлюбив, отечество оставил еси и, всех мирских мятежей уклонився, в тихое пристанище пречестных обители Богоматерни достигл еси; отнюдуже уведев непроходную пустыню, крестовидною зарею показанную, желательне ю обрел еси, и, в ней вселився, иночествующих собрал еси, и сих учеными своими, яко лествицею восходною на Небо, трудолюбно тщался еси возводить к Богу, Ему же молися, Богомудре Мартирие, даровати душам нашим велию милость.

КАНОН, глас 8-й

Песнь 1

Ирмос: Воду прошед, яко сушу, и египетскаго зла избежав, израильтянин вопиаше: Избавителю и Богу нашему поим.

Припев: Преподобне отче наш Мартирие, моли Бога о нас.

Благими нравами украсився, Христу прилепился еси от юности, плотския страсти умертвив воздержанием, и к Животу, преподобне, преставился еси.

Преподобне отче наш Мартирие, моли Бога о нас.

Глаголов и законов Божиих исполнитель быв, исполнился еси, отче премудре, Божественных даров и чудес всем лучи богато испустил еси.

Преподобне отче наш Мартирие, моли Бога о нас.

Крепостию Христа возмог, державу же и силу вражью низложил еси и похвалу победных почести, преподобне, чудесными сиянии улучил еси.

Слава: Совесть имел еси благу, око сердечное, взирающее к Богу, темже внят молитве твоей, премудре, и с преподобными сочета тя, Богоблаженне.

И ныне: Страсти плоти моея и ума моего двизания неподобная утоли, молю Тя, Пречистая Дево, и исправи мя, заблуждшаго умом.

Песнь 3

Ирмос: Ты еси утверждение притекающих к Тебе, Господи, Ты еси Свет омраченных, и поет Тя дух мой.

Преподобне отче наш Мартирие, моли Бога о нас.

Весь прилежя Вседержителю, преподобне отче премудре, всяя бесовския злобы избегл еси досточудным водворением в непроходима.

Преподобне отче наш Мартирие, моли Бога о нас.

Высотой смирения украшаем, свергл еси на землю велехвального горделивца плоти своея Божественными веленьми и добрыми делы твоими.

Преподобне отче наш Мартирие, моли Бога о нас.

Плотию обложен, отче премудре, смирил еси надменную выю нечестиваго благими к Богу въздыханьми, непорочне.

Слава: Имья поспешествующую тебе Божию силу, премудре, яко чуден во плоти сый быв, чудеса источил еси воскресением мертваго и ныне отгониши недуги.

И ныне: В ложесна Твоя воплощаем, Всенепорочная, вселися Зиждитель на благодаяние верно поющим Тя.

Господи, помилуй (трижды).

Седален, глас 4-й

Страстное поработил еси плоти своея мудрование и низшее свое покорил еси высшему, отче преславне, сокрушил бо выи бесов смирением и постом, во всечестных деяниях сущи, возсиял еси в мире; темже яко луча светолитнаго сияния Христова возсия нам, днесь воспевающим тя, Мартирие преподобне.

Слава, и ныне: Поём Тя, Богоневесто, Мати Христа Бога, славяще Рождество Твое непостижимое, имже избави ны лести и коварствия вражия и от всяких бед, Владычице Богородице, и верно Тебе вопиём: помилуй стадо Твое, Единая Пречистая.

Песнь 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Преподобне отче наш Мартирие, моли Бога о нас.

Содаяв, преславне, душу твою храм Святому Духу, был еси наследник Горняго Царствия, с Вышними чинами водворяяся, всечестне отче.

Преподобне отче наш Мартирие, моли Бога о нас.

Многоболезненные страсти всегда врачюеши приступающих к тебе тепле: благодать бо, преподобне, имаши от Господа содевати знамения и чудеса, пребогате.

Слава: Краснейшим прозябением, отче, в дому Божии прозябл еси, добродетельми украшен и плоды чудесными облагоухаем.

И ныне: Нива духовная, якоже из бразды Клас изнесла еси, всю тварь питающаго всяческих Бога, Приснодево.

Песнь 5

Ирмос: Утренююще, вопиём Ти: Господи, спаси ны, Ты бо еси Бог наш, разве бо Тебе иного не вемы.

Преподобне отче наш Мартирие, моли Бога о нас.

Умом очищенным преславне зриши, преподобне, доброту неизреченную – Христа, всяческих Бога нашего.

Преподобне отче наш Мартирие, моли Бога о нас.

Якоже Илия на колеснице, отче, добродетельми твоими возшел еси на Небо и тамо чисте зриши Святую Троицу, к Нейже духом горя и возлетая.

Слава: Стягнув тело твое, чистотою опеленая и воздержанием покоря его духу, стропотная вся оставил еси любве ради Христа своего и Небеснаго приобретения.

И ныне: Исцели, Милосердная Мати, недугующаго ума моего душевредное омрачение и озари светом разума Христа Твоего, Всенепорочная.

Песнь 6

Ирмос: Молитву пролию ко Господу и Тому возвещу печали моя, яко зол душа моя исполнися и живот мой аду приближися, и молюся, яко Иона: от тли, Боже, возведи мя.

Преподобне отче наш Мартирие, моли Бога о нас.

Лукавый умертвися змий священными подвиги твоими, преподобне Мартирие, темже и молящимся тебе вспомоществуеши разрешитися от его злобы, блаженне.

Преподобне отче наш Мартирие, моли Бога о нас.

Отсекл еси прилежно серпом, егоже виде Захарий серповидный, страсти от души твоея, темже, приобрел премудрости семеню, пожал еси многих исцелений богатныя класы.

Слава: Крепостию духа, отче, и твердостью постоянного ума твоего возмогл державу вражью и силу его низложить от себе и тем похвалу победныя почести приял еси, преподобне, верных осиявая умы.

И ныне: Пресвятая Чистая, Творец устрои Ты в жилище Себе, Христос Бог наш, темже ходатайствы Твоими избави нас от области лстиваго, яко да по долгу Ты чтим и убожаем.

Господи, помилуй (трижды). Слава, и ныне:

Кондак, глас 8-й

Отчества, преподобне, и всего мирскаго мятежа уклонитися возжелел еси, и, в пустыню вселився, тамо во блаженном безмолвии жестокое житие показал еси, и чада послушания и смирения в нем возрастил еси. Сего ради, дерзновение стяжав ко Святей Троице, еже, молитися, Богоблаженне, о нас, чадах своих, ихже собрал еси, и о всех правверных, да зовем ти: радуйся, отче Мартирие, безмолвия пустыннаго любителю.

Икос

Возлюбив, преподобне, Христовы Божественныя заповеди и возненавидев плоть и яже по ней земная мудрования, пришел еси усерднейше в непроходимую пустыню блатную, и, тамо вселився любве ради Христовы и душевнаго обогащения, яко светильник, просиял еси чудес дарования: царскаго бо сына яко от сна возставил еси и тем царя Симеона удивил еси. Сия облобызая, вернии, припадая, молимся: просвети очи наша душевныя воспевати достойно подвиги твоя: пощения, бдения, слезы и болезни, измождение тела блаженныя ради будущия жизни, еяже наслаждаяся, моли непрестанно о всех нас.

Песнь 7

Ирмос: От Иудеи дошедше, отроцы, в Вавилоне иногда верою Тройческою пламень пещный попраша, поюще: отец Боже, благословен еси.

Преподобне отче наш Мартирие, моли Бога о нас.

Прошед подвиги постныя, отче, умом крепким гордую выю смирил еси, Божественным вдохновением и спасительным Богообразным подвижничеством душу твою украсил еси, поя: благословен Бог отец наших.

Преподобне отче наш Мартирие, моли Бога о нас.

Краснейшее прозябение, отче, в дому Божии произраст еси верою, сугубейший

плод принёсл еси добродетельми, теми украшен, чудесы облагоухал еси.

Слава: Просветив твоё сердце умилением, начальник был еси священнейшаго собора, отче, наказуя, и уча, и вся к Божией воли приводя, поюще: отец наших Боже, благословен еси.

И ныне: Ново Отроча рождающая, Пребезначальнаго Слова, обетшавшия ны зело грехом, верная обновила еси, Дево, и воспевати научила еси: отец наших Боже, благословен еси.

Песнь 8

Ирмос: Богоглаголивии отроцы, в пещи со огнём пламень попирающе, пояху: благословите, дела Господня, Господа.

Преподобне отче наш Мартирие, моли Бога о нас.

Наследниче Божественных селений, Ангельски, отче, пожил еси; тем, со Ангелы водворяясь, ликует в чертогах Небесных со святыми дух твой.

Преподобне отче наш Мартирие, моли Бога о нас.

Невозвратным умом и невозвратными стопами, Богомудре отче, шествовал еси, досточудне, к Небесным селением, Евангельскою стезею направляемь, от стропотных путей до конца уклонился еси.

Слава: Всельшеюся в тя благодатию Святаго Духа, отче Мартирие, благоустрояеши души притекающих к тебе: лукавню бо страстьми в человецех действующий нечистию души отгоняеми бывають.

И ныне: Вода еси неисчерпаемая, Девице, Дщерь Царя Небеснаго, от Неяже вси вернии, пьюще, благодати исполняемся, душею и телом освящаемы.

Песнь 9

Ирмос: Устрашился всяк слух неизреченна Божия низхождения, яко Вышний волею сниде даже и до плоти, от Девическаго чрева быв Человек. Темже Пречистую Богородицу, вернии, величаем.

Преподобне отче наш Мартирие, моли Бога о нас.

Исцеление источает богато честная твоя икона Божиим Духом, и страсти многовременныя исцеляет, отче, приходящих к тебе, и прогоняет лукавыя духи лютыя, и воздвизает верныя восхваляти твоя светлыя подвиги.

Преподобне отче наш Мартирие, моли Бога о нас.

Яко великое солнце, нам величием подвиг твоих возсиял еси в пределах страны сея: умерый бо, прешел еси от света к Свету, от гроба возсиявшему. Тем вопием ти: просвети и наша помышления, отче преподобне Мартирие.

Преподобне отче наш Мартирие, моли Бога о нас.

Тело твоё, блаженне, терпеливое, вязавшееся веригами, страсти неисцельныя прикосновением исцеляет, Богу и Спасу, ты вельми прославльшу, отче премудре и досточудне Мартирие, яко дела твоими добрыми прославльшуся, преподобне.

Слава: Процвел еси в постнических удолиях, прехвальне отче наш, яко шипок многоцветен, и, яко крин, облагоухал еси совести верных добродетельми и чудесы: темже, преподобне, отжени от нас страсти смердящая.

И ныне: Просвети, Чистая Дево, сетующее сердце моё присно преступленьми и житейскими молвами, не остави мене врагом быти в радость, яко да славлю Тя и любовьию пою, Препетая.